

KHASITOMO YA SARS YI YIMISA KU TLULA 333KG WA KHOKHEYINI YO DURHA KU TLULA R167 MILLION ERIVALENI RA MISAVA RA SWIHAMPFHUKA RA OR TAMBO

Tshwane, 25 Mhawuri 2026 – Vukorhokeri bya Xibalo bya Afrika-Dzonga (SARS), hi ku tirhisa xiyenge xa yona xa Khasitomo na Ekisayizi, namuntha byi yimisile ku tlula 333kg ya khokheyini enkarhini wa xitirhwana xa nsindziso xo kongomisa lexi endliweke eRivaleni ra Misava ra Swihampfhuka ra OR Tambo (ORTIA) eka xihampfhuka lexi fikaka ku suka eSao Paulo, Brazil. Khokheyini yi pimanyetiwele eka nkoka wa le xitarateni wa R167 million.

Xitirhwana xi endliwele kun'we exikarhi ka tindhawu tinharhu ta nkoka to phurosesa to nghena, ku nga tindhawu ta xihampfhuka to chicha mirhwalo, ndhawu yo kambela mirhwalo ya vufikeri bya vakhandziyi na mikambelo ya mirhwalo. Nghenelelo lowu hlanganisiweke wu vumba xiphemu xa matshalatshala lama tiyisiweke ma SARS ku lwa na ntshukotshuko lowu nga riki enawini wa nakhotiki na tinhundzu leti aleriweke ku nghena hi tindhawu to nghena no huma ta Afrika-Dzonga.

Enkarhini wo kambela eholweni yo fikela ya misava, vatirhi va Khasitomo va kombile swiphemu swimbirhi swa ndzhwalo leswi nga na khokheyini. Ntsengo wa switina swa 75, leswi tikaka 83.10kg, swi kumekile endzeni ka tibeke. Mhaka yi yisiwile xikan'wekan'we eka Vukorhokeri bya Maphorisa bya Afrika-Dzonga (SAPS) mayelana no lavisisiwa ku ya emahlweni no phurosesiwa ka forensiki hi ku fambisana na xileriso xa vona.

Eka xiendleko xa le tlhelo, mbyana yo nuhetela swa nakhotiki ya SARS, *Lagertha*, yi kumile nkumeko eka mabokisi ma mune lama nga kombisiwangiki lama chichiweke ku suka eka xihampfhuka xo fana. Ndzhwalo wu kumekile ku va wu ri na 250kg wa khokheyini. Vativi va swa forensiki va SAPS va vitaniwile eka mbono ku sirhelela no phurosesa vumbhoni. Khokheyini leyi kumiweke eka ndzhwalo wa mukhandziyi na mirhwalo a swi ri na mfungho wo fana wo tsariwa "Air".

Khomixinara wa SARS Dkd Johnstone Makhubu u vula leswaku miyimiso ya sweswinyana yi kombisa vuswikoti bya modele wa nsindziso lowu hlanganisiweke wa SARS, lowu hlanganisaka nhlengelo wa vunhlori, mixopoxopo ya switiviwa leyi yaka

emahlweni, ku phurofayiliwa ka nxungeto, thekinoloji, na vurhonwana bya vatirhi va Khasitomo lava rhumeliweke emindzelekanini ya Afrika-Dzonga.

"Xitirhwana lexi xi kombisa leswaku SARS yi le ku tiyiseni swinene tshaku ra yona ro bvumbunula no kavanyeta mitlawwa ya swigevenga yo ngungumerisa ya xiyimo xa le henhla. Ku humelela ka xiendlo xa nsindziso xa namuntlha i mbuyelo wa switirhwana leswi leteriweke hi vunhlori, ntirhiso wa switiviwa wo pfuna na nxopaxopo wa nxungeto, na vurhonwana bya xiyimo xa le henhla na vutinyiketeri bya vatirhi va hina va Khasitomo lava tirhaka ku ya hi nkarhi ku sirhelela mindzelekani na ikhonomi swa Afrika-Dzonga."

"Yimiso lowu hlanganisiweke wa khokheyini ku suka eka ndzhwalo wa mukhandziyi na ndzhwalo lowu nga kombisiwangiki eka xihahampfhuka xin'we wu kombisa nkoka wa nsindziso lowu hlanganisiweke. "Ntekelo wun'wana na wun'wana lowu humeleleke wu pfuna ku sirhelela vaakatiko ku suka eka nkucetelo wo biha wa nxaviselo wa swidzidziharisi no tiyisa hi vuntshwa xindzhuti xa nxaviselano lowu nga enawini. Ndzi tsakela ku khensa tiejensi hinkwato ta nsindziso wo landzelela nawu mayelana no tirha kun'we ku kavanyeta nxaviselo lowu wa swidzidziharisi. Ndzi tlhela ndzi yisa amukelo wa hina eka vatirhisani va hina va misava eka ntirhisano wa vona eku lweni na vugevenga bya mitlawwa bya rixakanyingi no sirhelela mindzelekani ya Afrika-Dzonga. "

Mayelana na vuxokoxoko hi xitalo, u komberiwa ku tihlanganisa na SARSMedia@sars.gov.za.

MAKUMU